

四庫全書

集部

欽定四庫全書

兩宋名賢小集卷二百九十四

宋 陳 思 編

元 陳世隆 補

順適堂吟稿續集

垂虹亭

東西耕釣窟左右利名津倚遍闌干曲知幾有幾人

鱸鄉道院

田可耕兮圃可蔬幾年夢不到亨衢山林受用琴書鶴
天地交遊風月吾事變無涯人老矣死生有命汝知乎
客來時復一杯酒畫作鱸鄉醉隱圖

送徐兄訪陳宰

投老持竿柳外邨尺書久不抵修門料應下榻從容日
自說通家好子孫

山行

舍棹入山村山深樹自繁短歌田舍樂長揖野人尊苔

老雲生石松高月闔門不聞名利語太古一乾坤

瀟湘八景圖

平沙雁落

江風飄塵白如練征翰遠赴蘆花岸寒霧昏昏漁火明
欲飛不飛行陣亂相從萬里多崎嶇呼鳴警察夜有奴
衡陽路杳速歸去未可容易來江湖

遠浦歸帆

水天冥冥日催暮輕蒲飽風疾飛羽回頭遙指舟前灣

浪急蓬歌下柔艚稠楊枯桑深處村老妻挾兒環在門
尊羹香滑茅柴熟對語別時應斷魂

山市晴嵐

崑麓新霽浮紫烟幾家鷄犬喧一鄮憧憧人得蠅頭利
不了青帘酤酒錢松陰散亂日易暝風光漸入牛羊徑
頽肩赤脚分途歸野唱樵歌動幽聽

江天暮雪

癡雲貼水天四垂寒鴉凍雀無樹棲紛紛萬頃水花亂

光眩銀海迷東西中有輕舸移斷浦玉笠瓊蓑一漁父
鼓枻而歌歌豐年田家有麥無愁苦

洞庭秋月

長波渺渺七百里蒹葭颯颯西風起玉輪碾出琉璃宮
碧落空明無表裏幾峯森列青雀窺不知人世皆塵埃
夜深絲竹遞清響疑是楚王曾歸來

瀟湘夜雨

雲氣浮江天已夕江樹號風飛雨迫淒涼正則賦懷沙

疑與漁翁分半席一聲暖乃隔中流打蓬漸霎添旅愁
土膏動脉曉色媚農將有事於西疇

劉言史瀟湘詩開
歌暖乃深峽裡

烟寺晚鐘

冥濛一秣籠崢嶸深處傳鐘聲溪橫古槎低欲折
隱約前村通去程萬里征夫不知宿數盡飛鴉棲古木
輸與鐘邊三四僧枯藤挑雲歸佛屋

漁村夕照

家家傍水開柴扉綠楊影裏沈斜暉妻炊黃梁子掛網

獨枕莓苔眠釣磯得魚博錢平生志世間寵辱不能累
路近桃源多喬孫定知秦晉興亡事

古意

逝波不可迴白鳥不可馴古人成感慨今人猶古人

又

境空納風月心遠辭埃塵終日窮目力得景亡天真

次韻

生涯老布衾清處更清吟舊事即新夢今人非古心意

行雙謝屐道在一陶琴誰解無名利其中有淺深

次池亭韻

憑虛結草亭占得古來清睡債茶驅遣詩情酒發明梅
撐拳石瘦蘆障一闌平未盡逍遙意重尋枕簟盟

秀實長子玉麟暮晡

門左蓬弧喜事新四朝先佛慶生辰曉曉已露時頭玉
表表因名繫角麟鼻祖同庚先後葉卯君著瑞定前身
我來摩頂為兒壽一歲從今百歲春

琉璃砲燈有魚

體製先天太極圖燈籠真是水晶無遠看玉兔光中魄
近得驪龍頷下珠一焰空明疑火燧寸波靜定即冰壺
游魚且作沉潛計鱗甲成時入五湖

張中廉知洋州人號水晶燈籠

幼弟墓下

庵扁看雲用少陵句

春到棣無色風來松亦悲細看雲起處不復雁歸時憶
汝九京隔嗟予兩鬢衰寥寥今古意獨許杜陵知

室人墓下

楚愴埋香地卿須念藁砧齊眉中道決同穴百年心刀
尺凝餘澤松梧帶老陰可能如饁婦相對白頭吟

次孫花翁韻

湖海幾年經論交偶然坐間尊島佛客裏識坡仙解
使狂心服還羞懶腹便拈來唐句法尤入小乘禪

范蠡

吳江三
高祠

越敢吞吳皆范子後來廟食太湖濱邦人豈是忘仇怨
要勉吳臣似越臣

張翰

膾鱸元不動鄉思拂袖西風已見幾江上如今來往客
但言鱸膾不言歸

陸龜蒙

江湖蕭散樂平生夜課圖書日課耕一段高風猶凜凜

逢人肯說鴨呼名

文公談苑謂相傳陸龜蒙多智數狡
獪有內養自長安使杭州舟出舍下

童奴驅羣鴨出內養彈其一折頸龜蒙遽從舍出大呼
云此綠頭鴨有異名善人言遠將獻狀本州貢天子今
持此死鴨以詣官內養少長官禁不知外事甚驚駭厚
以金帛遺之龜蒙乃止因徐問龜蒙曰此鴨何言龜蒙

曰自呼其名巧捷多類此予嘗觀其傳誦其文矣龜蒙
字魯望居甫里著吳興實錄四十卷笠澤叢書四集以
高士召不至躬自舂鉅品茶評水不與流俗交升舟則
蓬席束書筆牀釣具往來江湖間謂江湖散人或號天
隨子甫里先生自比涪翁漁父江上丈人清風素節凜
凜千古因疑談苑所傳之過况予所居視甫里無一舍
遠其地荒僻眇在松江之東去驛程猶有數十里使者
無由過之自武宗至昭宗凡六十三載未嘗遣內養使
杭州揆之地里考之唐紀信
其為誣豈談苑別有所據云

欲別

欲別哽無語蘸酒評歸期潮汐有朝莫即心無轉移

次韻

懶作千年調偷閒得幾回吟壇元不峻俗駕可曾來
碧墻陰合榴紅屋角開枕肱真樂在飲水當傳杯

夜坐偶成

蓴鱸江上鄉穩處著虛堂却埽百念息貪吟萬景忙螢
淚風戶牖蛙鬧雨池塘夢熟田家事牛衣趁蒔秧

次月蝕韻

起來搔首夜如何瞥見蝦蟆影裏過幸自十分懸素魄
豈應一息駐妖魔光清於水塵難滓色白如圭玷可磨

休誦玉川艱險句終篇此興為元和

次吊屈原韻

為憐舉世不曾醒放浪形骸澤畔行會得危言危行意
佐成濯足濯纓名義無可去緣同姓心亦何求要獨清
今日龍舟雖古意吳人未必楚人情

笑靨花

簇簇瓊瑤眉花神點綴工似知吟興動滿面是春風

涵空閣 靈岩寺

浪說涵空未是空一闌羅列几寵從世人若問空中景
此景從來是夢中

草堂

幾年蝸蚓占山扉喚轉風光似舊時從此禪門多事在
篆香重課少陵詩

琴堂

片石隣空掌樣平吳兒曾此御瑤琴琴中腔調誰人識
獨有顰妃是賞音

洗粧池

離宮脂粉尚淍香人去僧來歲月長
鐘磬成功德水根塵洗盡水清涼

卓筆峰

天平寺

疑是飛來天柱峯一尖秀出白雲中
料應宰相書成後留得殘毫倚半空

一片峰

十丈蒼珪似削齊摩挲信是古來碑
不刊二范忠勞績

合寫諸賢唱詠詩

頭陀巖

舊說頭陀坐石巔披肩壞衲不知年空巖賸得頭陀號
啼鳥枯松也解禪

一線泉

銀潢萬丈下嵯峨想是天孫掛玉梭休道此泉絲樣小
涓涓將見作江河

次韻

時清歎陸沈楚澤伴漁吟
探索聖賢語發明天地心
無機慕少看有趣樹多陰
坐上皆知已賡酬夜向深

春曉

紅紫雨離披風光別壯時
世情楊絮覺心事杜鵑知
屋角漁連井林梢菊障籬
幸無塵役役倚檻數晴絲

又

春色漸昏昏那逢日帶曛
落花紅一尺新筍綠三分
憶友盟留石尋詩思入雲
風光到田舍瘦策看耕耘

自遣 偶對格

蟻夢功名覺即休
駒陰歲月去難留
傷今不復并三樂
擬古猶堪續四愁
松下抱琴塵外境
雨餘蒔藥柳邊洲
老來莫問浮生事
醉後同為造物遊

順適堂

甫里相望江盡頭
得隣而隱了浮休
落花流水元無礙
野鶴孤雲儘自由
順裏委心彭澤賦
適時乘興剡溪舟
區區世上分蠻觸
對客忘言茗一甌

曹娥廟

孝本當為事時人或不然娥今知此理命也委之天五日抱屍出千年作史傳英靈猶耿耿有慊莫登舡

憶弟

支藤來海嶠骨肉海西邊對月成千里舉頭同一天更沈寒戍角歌急晚潮船孤雁知人意聲聲落枕前

相逢

相逢疑舊識敲火自煎茶盛欲為留計其如未是家東

西分地脉南北兩天涯別後思君處空齋識燭花

自感

未險先藜杖逢亭便小留今番已非昔後去可能遊

又

倦聽花鄉曲狂歌俠士行年華與心事醉裏自分明

山居

古木環池竹數竿疎籬補菊屋三間白雲不放紅塵入

無怪山人懶出山

元夕

一簇蓮燈亦可觀，隔牆簫鼓二更殘。
平生未識繁華事，旋借宣和國史看。

省墓

隴上松杉手自移，至今苔蘚半寒枝。
夢中不記重泉隔，猶學兒童戲綵時。

梅

霜月相摩漏二更，書窓伴我一枝橫。
自矜前輩持清白。

妬紫嬌紅總後生

虎神

生長古林丘擒來鐵繫囚休憐文變豹尚覺氣吞牛檻
穽終難脫咆哮亦可休山中藜藿少君合早為謀

崇道叔慶七十

寄意南豐一瓣香願公耆艾職而昌歷經七甲鬢浮綠
帶錫萬釘眉映黃疑是函關逢老子歸然魯國有靈光
陰功更說燕山桂留與詩人作義方

柳禁烟霧風月翠

綠眉舞八字

態度脂韋不自持對人無柰小腰肢
好於彭澤歸來日瘦似章臺別去時
隱隱輪蹄端不惡深深亭榭最相宜
流鶯百轉春光老擬折柔條寄所思

可山寫梅

放出東風手段寫成江路枝梢君復無聲
句法要與廣平解嘲

信步

九十日春未老兩三番醉如泥行遍菜畦麥隴未饒十里蘇隄

嚴子陵祠

橫足黝黝夢御牀祇將故舊視君王意嫌漢室乾坤小
歸占嚴江日月長獨繭絲頭忘寵辱生芻庭上閱興亡
留題多是功名士也為留題姓字香

獨繭絲
出列子

參選有感

元是江湖瀟散客誰將幽夢落南柯十年不調幸然好

一着纔差悟處多，肯使北山馳鶴信。
且隨西舍唱漁歌。
野人自喜無彈繳，却恐金章美綠蓑。

春晚

閉戶蠶新浴，開簾燕早歸。
何曾春欲去，自是物華非。

又

蝴蝶夢中意，杜鵑聲外愁。
問春春不語，柳絮暗汀洲。

詩僧

同住西州一水濱，東州勝處始逢君。
詩成又逐行雲去。

後日相思抵看雲

偶成

留得春風趁馬蹄日長無事綠楊隄
菜花籬落誰家酒
緩轡長歌過小溪

西湖

湘桃深處五陵家
隄柳陰中百寶車
多是問桃尋柳去
近來山下少梅花

憶友

蕭蕭簷角雨冉冉雨中舟年老難於別春寒重却愁風
牕亂書葉塵壁暗燈篝夜半無來雁披衣對小樓

次韻

疎牕小博山牕外鳥關關占得江湖隱佐成天地閒簷
牙叢篠碧牆隙兩鳩斑癡坐不知晚漁蓬倦釣還

次賦順適堂

萬卷藏書抵萬金翛然軒宇絕塵侵順時不作榮枯想
適意元無勝負心蒲石疎簾真道院柏香淨几小叢林

四時剎有閒風月醒裏尋題醉裏吟

有所思

仰天有所思心遠目苦短西風驅殘雲千里月華滿

阿育王寺舍利塔

粒粟懸懸左角鐘幾年鎮壓梵王宮要知八萬四千所
元在尋常一念中佛現紫金歸勝地僧誇烏石墜虛空
毫光起處無人見明月堂前玉几東

舍利八萬四千所
舍利在塔左角金

鐘內有八珠利勝地佛紫金身育王孽塔行虛空有弟子墜地變為烏石今猶人形明月堂在塔之後玉几山

在塔
之東

山居

朝踏山根雲暮歸雲中扉野鳥始驚避今鳥情依依異
哉海山鷗猜疑未忘機



兩宋名賢小集卷二百九十四

欽定四庫全書

集部

兩宋名賢小集卷二百九十五至

詳校官中書臣閔思毅

助教臣常循覆勘

總校官編修臣王燕緒

校對官編修臣曹錫齡

謄錄監生臣吳濬

欽定四庫全書

兩宋名賢小集卷一百九十五

宋 陳思 編

元 陳世隆 補

芸隱勸游稿

施樞字知言號芸隱浮玉人紹定初累舉不第從
辟入吳攝使臺幕往來錦溪間富吟咏自為序云余
萍汎不羈每多感賦暇日搜故篋得可意者百篇題

曰芸隱勸游稿丙申赴浙漕舟宮旋捧檄東越董築
江隄事竣秩滿歸又哀集所作共百二十題嘉熙庚
子自序云先正詩野水無人渡孤舟盡日橫與樞官
業偶同遂命曰芸隱橫舟稿世所傳芸隱詩集即二
稿之合編也

立春

雪花風細拂春旗一色雲邊漏暖曦
羣吏守文行故典
長官書祝致新祠
土牛底事遭身碎
綵勝隨時把鬢欺

爭似野人閒可睡枕邊搔髮自吟詩

感春

等閒羈旅欲歸難又見蔬盤簇綵幡九十日春從此始
萬千心事對誰言梅邊粉墜寒香骨草際青歸野燒痕
且把一盃酬好景花風今日已翩翻

春前一日雪

歷頭只有今朝臘猶雨霏霽滿太虛六出試雜梅欲妬
萬花飄絮柳難如雲凝慘送元冥旃風舞歡迎青帝車

始信春工多富貴便堆白玉滿前除

春日

春到谿山已近旬尋春猶自負深情愛閒長向梅邊立
趁暖時從竹下行苦乏詩材無可惜更嫌酒病有餘醒
笑來豈是因名利纔有關心便不清

贈湖邊柳

亂撒鶯黃拂晚晴天涯多少故人情游船空逐輕陰轉
半屬春風半屬鶯

夢遊徑山值雪擁爐賦詩

雪天元自冷何況是山中

此聯是夢中句

雙徑衝寒霧千林戰

晚風空中人已定爐內火常紅萬事皆如夢誰知夢亦空

次蒙齋至日韻

試撿清臺歷黃宮氣已回功名難強致歲月任渠來雨
暎猶存菊烟村可問梅為貪吟有伴到此又徘徊

玉泉

水蹟無增減從知地有靈
羣魚潛異窟一芥納滄溟
濟隱新留詠超師舊講經
聖時調玉燭龍睡不須醒

老僧念佛

身世皆空境知空自不悲
何須臨暮日逐急念阿彌
裴相安心際維摩懺罪時
同歸無有地明月在秋池

和蒲潭韻題秋潭買山圖後

身世如萍漫浪休機心誰遣誤
沙鷗從來風月驚人句
即是湖山買屋謀訪友定尋雲外寺
携壺須上竹邊樓

知音自有漁樵侶莫被人稱第一流

對雪

怪得連陰不放晴直教飛雪試輕盈風回冉冉霓裳舞
雲暗紛紛鶴羽明大似梅花饒一出薄於柳絮更多情
披衣端為詩催起吟得詩成分外清

霸國祠

類說中有及臨安縣土地始末者城狐社鼠妄自依憑
可愕而怒也及來錦溪因式是祠三肅而薦之以詩

瓶笙驚晝睡此意有誰知蛙井成何事鴻圖豈易窺一
身雖戮辱萬姓免瘡痍茅土今何在惟存霸國祠

早起

早起看花露西風把鬢欺心清多在道夢好亦成詩過
但思求已生無事皺眉功名緣底事到手却如遲

漕闌揭曉後述懷

畫眉深淺與時殊肯向堂前怨舅姑自是吾儂多震薄
可堪爾汝肆擲掄心知不是池中物眼獨羞看屋上烏
得喪總為身外事不如委命樂樵蘇

畫眉事出
朱慶餘詩

聞鴈

飛盡沙田到水鄉
年年來往為誰忙
只貪夜月蘆花宿
不是將身傍稻梁

通真觀

袁都錄自號凝安御書扁其堂舊有桃源洞今蹤跡湮沒不復可考

不到凝安二十年
丹青一幅尚依然
青牛已去仙蹤遠
却有山禽下玉田

桃源事已成荒幻
那更形容學避秦
欲訪舊蹤無處覓
滿山花落不知春

泛月夜歸

短艇衝寒泛淺沙
滿溪明月浸蘆花
忽驚遠岫燈光發
籬落蕭疎一兩家

龜溪市橋見月

樓臺疊翠遶清溪
淺淡雲邊月一眉
行到市聲相接處
傍橋燈火未多時

寄寶藏壁天瑞

路轉小橋東
羣龍擁梵宮
荇花明晚水
蓮葉向秋風
匠斧應休役
禪窓定費功
笑他塵俗者
客路每匆匆

夜寒有作

可怪輕寒薄短衾起來搔首傍燈吟百年易老風前鬢
萬事難侵水樣心雁叫雲天秋渺渺蟲鳴露砌夜沉沉
朱絲自寫無人識一曲寥寥太古音

入京

何期又泛玉京船行止於人不偶然寒力勝如前兩夜
世情熟似近三年只將興味留詩裏苦乏工夫到酒邊
萬事看來忙不得只須委順樂吾天

憶孤山

孤山不是遠只隔鳳城門爭賞詩家句誰招隱士魂秋
風林下塚寒月水邊村擬待梅花發長吟酌一尊

小樓獨坐用菊潭壁間韻

簾捲疎風入小樓夕陽銜鴈欲西流無人細說吟邊事
獨有黃花共晚秋

別高家店

獨抱朱絃識者稀湖山與我獨相知煙迷柳岸經行少

月照梅牕做夢遲
酒價寒高誰與貫
衾綿夜薄自多思
歸舟又值商量雪
好似清溪訪戴時

夢回

銀漏迢迢箭緩傳
夢回月在早梅邊
小池凍合寒蘆折
應是鴛鴦夜不眠

馬上

只為谿山有宿盟
兩旬兩度此經行
馬嘶險逕霜蹄滑
鷗舞平沙雪羽輕
豪氣不從塵外減
新詩偏向道間成

梅花似有相迎意野水籬邊數蕊明

讀真西山奏疏

人事從來不可憑誰令漢祖議和親連衡休易從游說
厝火當憂卧積薪黥在淮南謀自寢亮亡司馬志方伸
木強始見遐衝折信是經綸直要人

新月照雪

等是尋常月因添雪更明看他同樣白與我一般清睡
鶴應難認栖烏亦屢驚梅花仍有意相伴聽寒更

雪晴

送臘終宵舞知春破曉晴燒痕隨草長霽色映梅清溜
滴簷簪折冰開沼鏡明夜窓如對月還又憶輕盈

對雪

誰使霓裳逞細腰隨風盡日袂飄颻飛花却訝春將遍
舞片還驚凍易銷看熟似同鷗過渚興仙剛道鶴冲霄
吟成誰與相酬酢賴有疎梅伴寂寥

正月十四夜

羈游偶值上元時
蓮艷燒空照錦谿
堂上珠簾如水浸
庭前鰲架與山齊
風傳鼓吹春聲鬧
雨過笙歌夜語低
自笑蓬窓勤苦士
何當太乙為燃藜

新晴

寒窓寂寞度殘冬
接得春來雨又風
芳思悠悠空自遠
清游款款與誰同
林梢淡抹烟初霽
菜甲新抽土旋融
多謝殷勤簷鵲舞
數聲足喜夕陽中

分韻春字

柳外鶯聲錯喚人小樓吟苦不知春
落花飛過鞦韆去
一片閒情客裏身

綠字韻

曉帳香銷閒盡燭夢回山斷屏風曲
輕煙細雨客情多
南浦草隨新漲綠

書事

閒時但覺求人易險處方知為己深
世事盡隨流水去
白雲自識古人心

所見

齊眉沉醉綺羅叢
心事誰知付去鴻
不惜千金留粉黛
更無一語怨東風

閨思

簾底臨鸞惜歲華
鬢雲慵掠寶釵斜
落梅香斷無消息
一樹春風屬杏花

湧金門外

柳絲舞困起炊煙
羅綺相催欲上船
貴冶亦知春有夜

暖沙還付白鷗眠

春夜賦小字

岸桐花開春欲老
目斷斜陽芳信杳
東風不覺客情多
杜鵑啼月青山小

再行湖上

樓臺萬疊照斜暉
紅褪園林綠漸肥
艷是杏桃開過了
春風吹到野薔薇

小樓對月

京國誰曾念
旅游閒情芳思兩悠悠
却因今夜闌干月
引得春風上小樓

晚望

芳草迢迢客路長
柳邊吹絮燕泥香
桐花折盡春歸去
猶倚危闌問夕陽

再賦酬吳鞠潭

酌酒酬春醉晚紅
誰知書劍兩無功
漁竿冷浸半絲月
牛背閒消一笛風
仙夢不隨狂蝶亂
家書只倩素魚通

友聲更擬遷喬去底似人情較異同

覽鏡

心到無營本勸游何期身又客皇州
匣藏青鏡閒情薄
衣染紅塵滿面羞
風月幾曾於我少
波濤半是為人憂
故山幸自堪耕釣
不必生涯足是休

牡丹

天然貴格鎮羣芳
細雨叢中試寶粧
肯與亂紅爭國色
甘同柔綠挽春光
玉闌倚困嬌無力
金鴨沉烟不敢香

可惜承恩亭北賦苦無妙語告君王

留別詩僧

家山方繾綣客路復西東自念依明世誰令策雋功三
盃桑落酒一棹柳花風別後詩應好吟成寄短筒

送春

相逢九十日彼此惜芳期折柳停閒騎嚼花吟好詩經
年行遠別對景起深思日落不知處四山啼子規

懷友人

錦野重來已秀萼雨肥梅杏粉痕消晚山四面子規叫
曉樹一聲婆餅焦耐久交當如水淡慣游身亦似蓬漂
老鶯不省春歸久猶自教雛學徙喬

後塢示璧天瑞

幾年不到已公齋客裏明知未定家生滅無邊方共語
滿山春雨落松花

即事

暝色分煙上遠峯雨聲斷處又晴風寶屏香冷閒情遠

落盡薔薇一架紅

簷玉鳴

曉窓風細響簷鈴一曲雲璈枕上聞夢斷不知仙路杳

鶴銜松露入青雲

東天目

三潭之下有九溪之隔三潭之上有百尺瀑泉之勝飛橋之險涉深扳緣止到第三

池上兩池及飛橋則無計可觀所以限仙凡也又有東西三井石室朝陽三洞黃冠厭人遊覽

不肯指引僅披荆莽題名朝陽洞中

不辭巖險訪龍潭潭底無窮碧似藍亂石鳴灘谿過九

飛泉瀉瀑暫分三雖然道士能相引不比樵人得盡語
悵悵飛橋無路到乘風應許御雲驂

不謂山行得此晴有名勝處必須經玉田草滿春無極
石室人稀夜不扃自料俗情應厭勸誰知幽意在空冥
碧桃却似傳消息一曲瓊歌月滿庭

西天目

茗水之源出此山地如邾魯始躋扳三池浚澤高岡上
一勺為霖反掌間著脚不知蒼漢近無心直共白雲閒

何時結屋枕泉玉滌盡塵根學大還

題朝陽洞中東天目

一吸龍泉萬慮清更尋古洞入柴荆
桃花落盡春無路獨許騎鸞上玉京

題至道宮雲巢軒

西天目

碧霄路底作生涯雲亦何曾定有家
月印天池心宇淨水鳴環珮出松花

別天目

東尖森洞穴西目浚淵庭三日若為霽羣龍亦有靈立
依松作蓋坐倚石為屏猶恨歸鞍急回頭望遠青

聞西山訃音

奪到斯人處天心亦杳冥嘉謀猶未罄直道信無靈四
海方思雨中營忽隕星羣賢知孰附客淚欲飄零

芍藥

雖殊桃李競年芳色相惟應付夢鄉綸閣曾看金縷艷
蕊宮初試玉樓粧露凝深淺烟中淚日汎溫柔雨後香

幸蜀歸來花正好可憐不忍看嬪嬙

天女霜刀剪亦難露紅烟紫碧闌干步搖衣袂飄霞珮
鈿合釵梁間寶冠枝上任他無力笑燈前還作有情看
采根若可蘇民病始信無經載牡丹

玉蝴蝶花

芳意深深掩綠苔粉團香翅自裴回多應又怨春歸早
化作飛花滿樹開

小瓊花

臨安縣齊山花一株四月盛開無識之者
效樂天昭賢寺花體以小瓊花賦之或謂

婆羅

花

合是孤根在廣庭
世間那得此雲英
霓裳一曲天香散
惆悵瑤堦月自明

午寢

舊詩零亂滿藤牀
綠映簾深一縷香
午夢驚回槐國遠
浮生消得幾斜陽

道間

一溪新綠漲晴沙
傍岸疎籬八九家
桑葉又抽麻正長

綠陰深處響絲車

再觀錢廟

荒碑五丈蘚生花
飛鼠巢梁壁綴蝸
華胄遙遙天下滿
不知誓券落誰家

牆外竹

森森新竹亞牆屏
籜解餘斑粉淚零
幸入詩家窮相眼
可能不為此君青

題鶴林丈室用俞紫薇韻

物我相忘付八還

坡詩

偶來瓊館扣霞關玉峯自有三生

約

玉蕊花事

塵世真同一夢間華表風清丹頂去緱山月冷

碧笙閒當知象外機無息肯羨黃金繫九環歐詩

五到洞霄兼似冲妙

多謝名山不厭人五來此地着閒身
泉聲帶雨驅煩暑空翠縈風絕點塵
金鼎火能知應候玉壺花自占長春
何時詩證三生約乞借烟霞與卜隣

楊蟾川鐵佛普度會

甲午冬

重陰九疊幾曾開
廣布陰功亦異哉
八景定中朝十極
五雲深處步三台
煙騰綠字鸞初下
月照黃壇鶴未來
去地一珠如黍米
天人競湊鬱羅臺

煒煜神光燭素屏
苦魂蒙度語堪聽
但知實相皆非相
自證無形入有形
火煉赤爐超上景
水流華沼蕩寒庭
功成試問誰能似
元子真人舊典刑

夜泊黃灣

移近黃灣泊短篷
野雲垂地一溪風
渚香吹散荷花雨

幾點流螢出葦叢

夜涼聽雨

暑雨沉沉夜正清
涼欺客枕夢頻醒
雖然未是秋時候
滴在梧桐亦厭聽

西河柳

一把輕纔拂地垂
柔梢淺淺抹燕脂
絮花吹盡枝方長
却恨春風未得知

三過垂虹

秋來三度過垂虹
灝氣橫江水接空
帆影輕浮千幅月
漁竿冷浸一絲風
楓初落葉前村近
荷有餘香別浦通
笑拍闌干天地濶
鱸尊酒許誰同

滄浪

長史遺蹤二百年
直教名字到今傳
渚香細浥蓮須雨
野色輕圓竹尾烟
但得幽情關水石
何須隱迹痼林泉
客中正有塵纓在
來此清遊亦是緣

水次秋蚊可畏

利觜似花鷹針膚不暫停有生何蠢蠢藏毒在冥冥亂
舞迷昏水喧聲接晚汀風威秋晚勁看汝易漂零

中秋日虎丘呈庾使東畎先生

蹇步接輶軒於山亦有緣劒鋒遺斷石閣影倒平田紫
日穿林暝黃雲共野連清輝無著處月伴使星圓

清夜

客身隨取止一室冷如水景遠吟何托情疎夢不曾雨
粘初蘚壁風謝欲花燈豈是無家者甘為有髮僧

客中雨思

細雨粘雲結晚愁
黃金垂地菊錢流
風來不覺窓聲戰
分却羈懷一半秋

聞鶴

誰家嘹唳九臯聲
客夢初回曉帳清
華表不知仙路遠
剛隨寒角轉殘更

秋夜即事

斷雨寒雲過暝窓
落桐葉葉是淒涼
楚山不入清宵夢

月影蛩聲滿桂鄉

對菊

欲荒三逕負歸期
魂夢何曾到短籬
九辯不歌陶令老
清香還許入誰詩

開爐次夕以不禁離抱來訪宏菴挑燈細語漏促
忘歸即事有賦時黃澹翁在焉

客裏情懷不自如
夜深來訪子雲居
挑燈細按新翻曲
拂案同看舊架書
梧葉敲風蛩砌冷
菊香消雨鶴庭虛

相逢且與開眉笑莫遣吟邊酒琰疎

雪

只消頃刻便漫漫人亦求窺造化難
柳外情知非絮落梅邊誤作有花看
朱門合席持杯煖紫塞分屯坐甲寒
慨想英雄當此際肯分事業與袁安

和庾使和毛君玉送墨梅韻

東風吹上歲寒枝筆下工夫頗涉奇
此搴直應同晚節有香亦合併冰姿
淡於淺水籠蟾夜清似疎籬壓酒時

春在小窓橫幅裏調羹深意許誰知

蠟梅送東畎先生併寓探梅之意

澤國寒深未見梅東風何日到南枝
玉堂應有新消息恐是人間未得知

劍池

雨壁煙崖翠蘚長龍泓冷浸斗牛光
獨憐有水清無底不洗花池粉膩香

生公講臺有點頭石

千人湊坐雨天花片石雖頑識當家萬境俱空非有相
漫留塵跡與人誇

寄陳藏一

萬人如海亦紛紜還著江湖有限身題葉恨深波影遠
嚼花吟苦月痕新羨君朝市情俱薄笑我山林趣未真
名勝搜羅能盡否細論何日許相親

送同幕劉正父召試

合是冰壺真露寒果然筆札對金鑾雖云經世談何易

漫道憂時事轉難正氣必能回壞證中流當與障狂瀾
熟知議論平如砥且把清規作樣看

紹興城隍廟

芸隱以東畎先生命來游禹會稽星
夕後一日問宿江干明喚西陵渡忽

夢登一山上有祠宇甚偉下瞰數峯奔伏于前
面二小峯峯立一塔數水橫陳清徹可愛趨後
廡見一婦人立于西廂謂余曰公前身乃太湖
神仙也回視東壁皆丹砂顆粒鮮明因取十餘
塊吞之冷然而悟茫荒幻初無足紀遑謁東
猷令暫止于府貳之南廳翌日書院諸友携尊
慰藉便道訪西園徑城隍廟俯觀卧龍山勢起
伏前對秦望下有應天塔庭宇壯觀彷彿夢中
經行處因以中元日款柯下三肅賦
詩城隍姓龐諱玉唐人曾鎮此土

江頭曾夢見彷彿此山川
幻說從何證來游即是緣
言前世事我是太湖仙
神理俱冥漠清香漫致虔

借張憲韻述懷呈東畎先生

早起看秋意山前深未深水香飄遠渚晴色上平林
風雨一雙鬢江湖萬里心何期來此地時作短長吟

初泊世緣

紹興南
倅廳

不問蕭條傳舍空來歌客枕聽西風一庭明月無人玩
秋在梧桐落葉中

早起

簷前鳴玉響
丁東清夢初回
鶴帳中早起
井梧飄一葉
方知昨夜是秋風

風雨

入夏惟憂旱
秋來却浸霖
風聲連海響
山氣與雲深
望歲丹心切
憂時白髮侵
旅中無別事
隱几自長吟

禹廟

袞服嚴常祀
平成萬世功
圭璋藏道室
弓劍莽幽宮
石

定釘音今猶在梅梁事莫窮幽尋須作計多恨雨匆匆

高園

入門雖較小中却是壺天委曲松篁逕清新錦繡篇蟠胸有丘壑隨處是林泉更讀鰲峯句風流似謫仙

扁名俱不俗難得此規模一鏡荷香冷四圍花逕蕪沼寬魚自樂竹靜鶴同孤做盡東州景何須作畫圖

夢前室

長夜幾年別傷哉千古心自因緣較淺不是老相侵熊

夢如先兆驚膠豈續琴曉窓秋葉響不覺淚盈襟

西興寄呈東畎先生

生平未始識東州不謂招邀得漫游南鎮門前秦望曉
西興浦口浙江秋風搏怒氣潮初落山湧青冥雨乍收
豈為登臨重回首使星只在五雲頭

兩宋名賢小集卷二百九十五

欽定四庫全書

兩宋名賢小集卷二百九十六

宋 陳 思 編

元 陳世隆 補

芸隱橫舟稿

輪差祝聖所拈香

辦香來謁玉宸宮月在觚稜絳闕東
轉向玉街西畔過朝天萬馬正匆匆

幾度來游幾賦詩又因將命到靈芝
三呼祝了君王壽偷眼湖光立片時

至日謁廟吳山見日初出

曦龍浴海上扶桑雲表輝芒燭萬方
史館繽紛書瑞色禁城奕昱鎖祥光
從知繡線添紅影獨喜丹心向太陽
節裏官閒無一事諦觀易道靜焚香

解宇傍河彷彿家居

合是清溪近處居在官却與在家如
柳風拂岸時鳴櫓

梅月橫窓夜讀書休問舟閒無喚渡須知水到自成渠
俸錢已足供新粒比著簞瓢儘有餘

月下憶梅花

夜深寒月照窓紗忽憶林逋處士家鷗鷺正眠烟樹冷
不知誰可伴梅花

生朝報恩夜醮

絳節翩翩七寶車謠歌飛上玉皇家鶴壇月冷天風靜
開盡碧桃無限花

菊潭賦小窓睡香次韻

兀兀蒲團萬慮除
定回寒月滿康廬
幽香自有禪心會
春不相知亦任渠

夜聞城中簫鼓

簫鼓喧天競看鐙
都民應喜見昇平
芳心自不同年少
細嚼梅花坐月明

和東圃鄭震見寄

薄宦來京洛相逢久
更親丹心期為國
白髮易催人月

冷鳥驚夜霜明難喚晨吟邊頻自感還染九衢塵

題桃源圖

山中與世不相關
鷄犬桑麻盡日閒
傍水桃花春爛漫
誤傳消息到人間

和菊潭玉泉韻

不是靈源遠碧虛
可容六六化龍魚
講經人去前湖暝
翻手為霖自有餘

酬瓜疇趙鑪夫投贈

謀生百拙世無如
贏得心清剩讀書
薄宦喜從京國路
閒身還似野人居
濟川事業歸商傅
獻賦聲名羨子虛
歲晚且留梅作伴
吟邊月冷一枝疎

仲字歲晚書懷因次其韻

終有徵書訪綺園
心期獨向老天言
物情已逐東風轉
未必全歸野燒痕

端平除夕

宦遊來此亦隨緣
過了新冬又餽年
今夕桃符猶自寫

明朝柏酒讓誰先但令世道皆平地此外身名任老天
春與詩家如有意早傳清夢謝池邊

嘉熙元日

先春一日紀正元熙號初更氣候暄萬象光隨黃道轂
千官班奏紫宸門梅迎霽色來窓底柳挽和風到水根
但願時平年事好升沉有命不須論

立春

彩勝飄春上鬢蓬倚欄一笑問東風青青柳眼梅花面

纔染陽和便不同

雨後道間見紅梅

元都境界玉堂身
輕裊湘裊步晚陰
昨夜雨肥添酒暈
紅情染得十分深

盆梅

白玉堂前樹誰移
此地栽看教清意足
喚得艷陽回舞
片疑雲墮留香待
月來只應標格好
獨為歲寒開

春雪

臘裏霏微未許多春來舞片却交加混成天地皆同色
點染園林盡著花岸磧雲凝迷去鷺屋頭烟煖見饑鴉
東風畢竟能融化不放寒漸冰去聲柳芽

再雪

投曉又翻飛春風亦被欺須知寒徹夜勝似臘殘時艷
粉同梅落輕花替柳吹渾然成片玉凍合在前池

題龍首圖

變化成來體勢高坐令幽思起雲濤春雷一鼓驚頭角

碧海風輕袞絳桃

落梅

粉香消盡骨猶清
望斷瑤臺轉有情
便是百花無此分
看看事業到和羹

桃花

武陵人去水橫陳
獨向元都管領春
日暖風輕塵撲面
劉郎空老苦吟身

宿接待寺

梵境忽巍峩門前對市河有心弘誓願于此接經過郭
近人聲雜簷高雨氣多規模踰百載猶說喻彌陀

宿龍泉寺

有葛仙
丹井

既濟功成列左仙餘波猶作世間泉苔荒碧梵龍宮寂
庭老梅花月在天

橫瀆岸邊梅花方開

雪染梅花倚道傍亭亭野水弄幽芳東風似賞孤高意
未許飄零一片香

雙路

王命馳驅不敢輕文書要覈去來情青山步步生幽意
碧澗悠悠趨遠程春淺禽聲猶自小泥酥馬蹟正宜晴
地名見說名雙路便舍崎嶇就坦平

實際窓前睡香

瑞錦窠應對錦郎誰將靈種到幽坊山深月冷梅花老
壓盡羣英是此香

石橋接待

當年立雪直齊腰宗旨流傳到石橋
風急窓寒燈影遠
疎梅無語夜鄉銷

手筆華嚴梵笈新更開寶地接迷津
一聲金磬人初靜
月照空山草自春

聞寺中曉鼓

靈鼉一鼓振潮音
征夢迢遙枕畔聞
語斷頻伽天正曉
松風吹散滿山雲

跨水道間

店舍絕迢遙山深轉寂寥看鷗臨遠水下馬過危橋晴
雪林間少春風野外饒此行為王事旅食任蕭條

峒山舖

未說路行難山深分外寒曉村林隱寺春礪石鳴灘薄
宦曾無補勞生敢自安羽書今較少備禦莫教寬

杏塘

境接江東界郵程是杏塘雨喧茅屋小泥滑草橋長曠
野人稀少平田水渺茫半生遊歷地未若此荒涼

西安梵惠藏殿

記云曾經兵火不能焚法輪自轉

劫火不能焚空中轉法輪風霜鴟殿古金碧貝函塵物
本由成數人言不壞身却憐無問者遺蹟竟成陳

上司諫曹先生

聲名滿世重於山果見延登左掖班天子虛心求國是
先生著手濟時艱要看出處諸公上只在精神一轉間
前此極言雖引去安危理亂正相關

池萍

一番雨過一番多間挾晴風漲綠波柳絮吹殘游蹟在
謝池點點是陽和

分賦楊花

曲字

纖腰睡起芳情足誰道春風浪拘束日暮天涯細草多
輕風誤入闌干曲

雨吟

園林綠盡合清和猶有餘寒在薄羅幾縷情風春別柳
一庭苦雨夜鳴莎人於生處窮通定事到難時感悟多

水上浮漚頻起滅看來物理總由他

夜坐有感

不為名所累應是得安居客夢方知幻身謀反似疎風
高秋塞遠雨急夜窓虛猶望收來效頻翻舊讀書

送黃溱遊金陵

六朝多舊事誰與問江山我亦身重到材疎語竟慳燕
歸秋巷靜鷺去晚洲閒健筆無輕賦前賢轍可攀

酬山月江與投贈

帝里風光好，隨緣適宦情。
却居城郭外，不雜市廛聲。
水國霜天冷，梅庭夜月清。
正慚無雅韻，敢說到詩名。

梅花

竹籬茅舍本相安，誰與移根入畫闌。
儘道重簾妨暖日，疏枝却得護春寒。

風標負與萬花殊，可有塵埃染得渠。
把住瓊枝相晤語，只疑身在玉堂居。

和陸明叟

了無閒事上眉纖
一炷清籥靜畫簾
造化自從回暖律
芬華頓覺轉窮簷
輕風度柳春情薄
細雨催花上脉黏
所愧微官相束縛
何因共訪酒家帘

夜窓聽雨

一炷夜香清挑燈聽雨聲
雖然添客夢却可助詩情
澤沁蘭心重泥酥笋角萌
山行頻有約日日候晴明

破榴

絳殼盈盈萬顆珠
潤於瑪瑙浸冰壺
吟心先自清如水

嚼了寒霜骨更矐

登應天塔

雲級湧青冥金鰲載寶輪地高心自逸天近足無塵
圖畫千峯晚樓臺萬井春三生許元度曾此證前身

鰻井

在應天塔後羅漢堂舊間有泉透海後為婦人所穢今枯涸矣下即濮邱園廟

人言此井有靈源潮落潮生透海門陵谷未須窮變易
朱牆裏是濮王園

大能仁寺

山門八百餘年戊戌秋震於風雨

規模應甲剎殿閣擁金仙
歲歎炊烟絕城低野色連
客僧皆散去主者獨安眠
成毀難逃數山門八百年

留滯

何期蹤跡又遲留
行止於人自不由
夢境固知空似蟻
生涯却笑拙如鳩
碧涵一鏡晴天潤
翠湧千峯宿雨收
從此公餘須杖屨
未應草草度春休

曉寒

曲曲屏山憶夢中
峭寒成陣入簾櫳
宿香消盡金猊冷

一樹梅花怯曉風

晚思

客思悠悠幸自安亦因吟事可相寬
小窓過了廉纖雨
細與東風說晚寒

用明叟韻併寓山行未成之意

久客住蘭亭心同晉水清
忘機盟宿鷺伐木聽雛鶯
物亦知人意春寧有世情幽
尋空作計一夜雨連明

苦雨

何期一雨成三日約客行山竟未能春到分時陰不解
夜當深處氣猶凝簷低捲箔看飄灑礎潤添香散鬱蒸
想見故園梅落盡和羹消息未堪憑

雨中用雪坡韻

無計酬春獨有詩倚欄終日候晴暉東風漸屬新桃李
簾幕深深燕子飛

雪坡以雨阻山行有詩因以次韻

為欲看山助眼明頻占鵲喜報新晴春光已過三之一

塵世難逢四者并詩酒深情殊未適看蔬薄具亦頻更
終來不似西湖好晴雨皆堪傍柳行

月丹和鶴莊韻

靈種飛來鶴頂紅誰云九轉有仙功廣庭曾侍東風宴
留得霞杯照晚叢

禹廟

且要盡清懽須知一出難人因晴後喜春到水邊寬柳
長官橋媚梅飄客袖寒荒祠存禹蹟得得又來看

鏡湖一曲

天與平湖老賀郎春波依舊染晴光可憐千載風流意
付與租符晚夕忙

用雪坡春色韻

纔出城門興便濃晴光野色兩俱融柳方染得三分綠
桃已重成一半紅山湧林巒荒寺隱湖分港汊小舟通
相携各自論年事幾度春風上鬢蓬

用梅溪鏡湖韻

畎畝鏡中分滄波雜斷雲向來官裏賜今屬野人耘懷
古天難問貪吟日易曛羽衣遺傳本起誦想餘芬

天基瑞應宮

金碧耀瓊廬天開繞電區烏流周室瑞蛇斷漢家符石
井騰曦馭瑤壇布斗樞願將皇極福敷錫徧康衢

送東浦張應發歸永嘉

客裏偶相逢襟懷亦偶同對梅吟夜月折柳問春風子
勿言浮梗余方笑轉蓬歸程驚雁蕩得句附郵筒

碧桃

月浸虛庭夜未央一枝靜對白雲鄉三生自結元都約
來伴疎棋到玉堂

一春屢有揚州之約雨輒尼之將旋幙侍外舅來
游邂逅二羽衣一能參上道一能知大丹竟日留
話喜賦二解時清明日也

幾有行山約山靈聖得知仙家寧易到塵世亦何為草
潤非烟石花流止水池不晴還不雨正是賣錫時

欽定四庫全書

可字名賢詩集
卷二百九十六

裂石未嘗關母將俗眼觀虛中元有受造蘊亦何難羽
客能談道雲房識候丹只應仙有分風響步虛壇

道間見桃李花

東風到處競繁華不問窮櫚與大家垂柳絲中深院宇
隔牆時有出來花

龍瑞宮側訪仙姑不值

輕紅片片落桃花劉阮空迎紫鳳車石洞有天元不閉
何須流水覓胡麻

送妻叔歸括倉山

此身元是客還作送行詩笑語如今度綢繆似舊時買
船春載酒剪燭夜敲碁烟雨樓前景圖來慰所思

出西門寄呈外舅姑

自從依監宅不似昔時親義重難為別情同父更真一
簫思去鳳雙壁倚靈椿只等中除報相迎輦路塵

唐園

內人朝陵此
園供午頓

幽居已似水中仙更有亭臺在屋邊擬作小圖難盡處

一年兩駐內家船

覺苑寺

宋江淹舊宅今山門扁為江寺寺前橋驛驛中井皆以夢筆名酌水涼甚

此是詞人宅名因後世傳驛中存廢井橋下駐歸船一
夢空塵蹟千年尚福田筆靈應賸馥試為酌清泉
祇園寺許詢舊宅有戚公水

應天曾建壇又此結精廬釋氏緣何熟詩人念總疎壁
荒遺畫水僧老學醫書笑我重來者經年不定居

奉和龜翁送別

為說吟邊事曾陪宴笑頻自慙無韻者敢對有名人雨
洗秦山曉波明鏡水春匆匆還別去芳草正如茵

昨夜

昨夜陰風刮地鳴亂敲窓紙夢魂驚壁寒剝落泥成片
屋老漂搖瓦作聲野市霜明人跡險官河水冷客舟橫
翻思帶甲眠戈者何幸吟身傍帝城

兩宋名賢小集卷二百九十六

欽定四庫全書

兩宋名賢小集卷二百九十七

宋 陳思 編

元 陳世隆 補

雅林小稿

王琮字宗玉錢塘人積學敦行以孝友稱徽宗初
登進士第宣和中任太宗正丞提舉永興軍路常平
靖康初除左司郎中歷官兩浙江東漕副直龍圖閣

以病奉祠紹興間嘗避地居括遂家焉

北山訪僧晚歸

吟僧山北住又買過湖船半日得閒話一生無此緣波
光映酒興竹色帶茶烟歸路斜陽裏徐行聽亂蟬

蓬萊

柯山
倅圖

一棹三萬里何修入窈深水痕涵雨意巖影帶秋陰雖
愧無仙骨終能長道心古人殊錯計空向海中尋

讀書樓作

近來閒過日幽事頗相關
遠樹開晴晝歸雲當晚山
官情隨處薄詩稿逐時刪
骨若無仙分何因住此間

哭潘令

河陽桃李樹惆悵不逢春
官為吟詩折家因好客貧
故山歸去遠遺像挂來真
誰向江頭哭共鄉三數人

三巖

閒携一壺酒來對雪巖
斟秋老瀑飛瘦石寒雲宿
深坐無僧共話行有鶴隨
琴此處儘不俗令人生隱心

題獨醒小亭

東嘉酒舍
予所創

退食多留此，翛然一散襟。
涼從曉來覺，秋向雨中深。
牆竹侵山色，簷茅雜柳陰。
有誰能載酒，過我共幽尋。

挽何耐軒

調度如儒素，相門中所難。
一心惟好佛，半世懶求官。
星近緹屏落，墳依宰木寒。
遺恩滿溪麓，魚鳥亦辛酸。

客裏有懷徐太古

近來真倦客，怕蹋軟塵紅。
獨向一樓坐，靜觀諸境空。
官

河添夜雨宰樹帶秋風還憶能吟者襟期何日同

與劉天遊伯仲夜話雪中戲贈

水亭新得月坐對白蘋洲共說一夜話惜無多日留手
抄詩許借口誦咒如流最羨同吟處對牀風雨秋

秋夜有懷醉書十韻

秋風從何來颯颯入窓牖殘燈耿不寐照我容顏厚故
園豈不佳亦頗興懷否黃金桂百樹碧玉池十畝猿鶴
響空山亭臺映疎柳觥籌雜野藪筆硯得佳友愁無彈

鵲句雋有持螯手人生行樂耳功名有時有點檢屐幾
兩土宜米五斗浩然歸去來萬事不如酒

城西即事

清曉離家去路遥絕憐寒景太蕭條松深漸覺風聲急
雲動還知雪意消沙觜客擔魚種賣山頭人拾樹枝燒
梅花多處誰家酒斜舞青帘隔小橋

次韻項君玉

惠然乘興訪幽栖細雨冥冥濕杖藜七尺身強於鶴瘦

一生心不向人低
日尋靈藥行寒麓
時有新詩付小奚
欲解貂金同一醉
酒鑪間只在前溪

答友人

秋山曾是共登臨
感慨蘭亭後視今
炎熱不過能炙手
笑談未必到知心
前言袞袞風波去
後約寥寥歲月深
室邇豈應人自遠
酒盟詩社要重尋

京華病中

自移藥鼎在牀頭
桂玉令人分外愁
因病始知歸計好

欽定四庫全書

兩宋名賢小集
卷二百九十七

四

雖貧不向俗人謀
僧魯帶雨來看脉
僕為傷風懶上樓
賴有壁間新買畫
寒燈相對兩山秋

客南徐一首

秋來客裏幾蹉跎
醉缺惟堪浩浩歌
盛世未應知己少
諸公自是閱人多
潮生瓜步風猶急
苔滿浯溪石欠磨
憶昔祖生忠憤後
更無一楫是如何

次韻徐獻可兼別重吳

誰憐范叔戀袍寒
猶有徐卿二子看
大率率中多物忤

相知知到此心難最憐風雪分吟筆安得江山共倚闌
後夜小窓懷素帖挑燈應憶我同觀

代辟客送總卿歸吳

使星卿月照淮壖百萬貔貅飽據鞍出處豈無公論在
規模應有後人看半年水驛衣猶濕一紙天箋墨未乾
事與心違知已異折梅花到歲云寒

鄴中書懷

苦無官況莫來休羞見傍人說宦遊九十日秋蛩共語

兩三夜雨鴈供愁腐紅只有虛名在堅白難將實意疇
驛路梅花歸正好苦無官况莫來休

喜趙君甫赴班

西臺自是舊相知來了為山一簣虧入幕雖無多日在
焚書已是十年遲金閨接武人爭羨玉牒能文世所奇
此去錦鄉纔兩宿仙茅綠景正堪詩

題多景樓

秋滿闌干曉共憑殘烟衰草最關情西風吹起江心浪

猶作當時擊楫聲

漢荆王墓

廟在京口府治

落落廟碑墓瘞鶴陰陰宰木宿神鴉可憐寶劍凌雲氣
散作金燈滿地花

獨醒午坐

小槽停溜務廳間幙府文書省却難竟日徘徊無俗意
祇因竹外有秋山

張興

欽定四庫全書

經年客食向京華
懶對春風祇憶家
覺道近來全俗了
畧無一語及梅花

客中從厚祿故人乞米

范甌欲塵貧亦甚
陶腰未折計何如
小窓獨對蕭蕭雨
臨得唐人乞米書

舟過孤山

寂寞梅花處
士墳竹園巖
脚一泉深偷
瞻翠輦曾游處
水鑰年年護綠陰

秘省金魚池

落葉闌干小立時諸公慨想到腰圍
但知官餠堪為餌
不識人間有釣磯

觀潮

旗彩斜飛一命輕舟人却立萬舟迎
不應當日將軍事
猶到如今氣未平

獻可約遊北山阻雨

共約湖邊喚短蓬曉來何事雨兼風
山林只合閒人到

不入時官眼界中

立春有懷

十千呼酒醉長安
猶記年時客裏歡
有約南山南畔去
只挑野菜當春盤

兩宋名賢小集卷二百九十七